

* * *

ՄԱՅՐ ԱԹՈՌ Ս. ԷԶՄԻԱԾԻՆ

Սրտի խոր կսկիծով ընդունեցի մեծ Հայրապետի և ժողովրդի կողմից անսահման սիրված հոգևոր Առաջնորդի՝ Կաթողիկոս Վազգեն Առաջինի մահվան լուրը:

Նրա ազնիվ, բարի գործերը, նրա բոլոր գաղափարներն ընդմիշտ մնալու են մեզ հաջորդող սերունդների հիշողության մեջ:

ԱԿԱԴԵՄԻԿՈՍ ՎԻԿՏՈՐ ՀԱՄԲԱՐՉՈՒՄՅԱՆ

Երևան, 24 օգոստոս 1994 թ.

ՄԱՅՐ ԱԹՈՌ Ս. ԷԶՄԻԱԾԻՆ

Էջմիածին

Մարտիրոս Սարյանի ընտանիքը խորապես վշտացած է Ամենայն Հայոց Վեհափառ Վազգեն Առաջինի մահվան առթիվ: Նկարչի և Վազգեն Առաջինի ազնվաբարո ու վեհ մարդկային կապերը այսուհետև պիտի կազմեն արվեստագետի կյանքի պատմության խորախորհուրդ էջերից մեկը: Մարտիրոս Սարյանի ողջ գերդաստանը գլխահակ խոնարհվում է մեր ժողովրդի փառահեղ ու լուսավոր նկարագրի տեր Ամենայն Հայոց Վեհափառ Վազգեն Առաջինի շիրիմի առջև:

Երևան, 23 օգոստոս 1994 թ.

* * *

Ս. ԷԶՄԻԱԾՆԻ ԿԱԹՈՂԻԿՈՍՈՒԹՅԱՆ

Մեծ վշտով իմացա Ծայրագույն Պատրիարք Նորին Սրբություն Վազգեն Առաջին Ամենայն Հայոց Կաթողիկոսի մահվան լուրը:

Այս մեծ, զարգացած, պարզ և մատչելի մարդու, հայ ժողովրդի արժանավոր զավակի կերպարը, որն իր մեջ մարմնավորում էր ամենայն լավը, և որին ճանաչում էի ես, ընդմիշտ կմնա իմ հիշողության մեջ: Նա խոր իմաստության, մարդասիրության, ազգի հոգատար միավորողի օրինակ էր հանդիսանում:

Ընդունեցեք իմ անկեղծ ցավակցությունները և կարեկցանքը:

Վ. Ս. ՄԱՐԳԱՐՅԱՆՑ

23 օգոստոս 1994 թ.

* * *

ՄԱՅՐ ԱԹՈՒ Ս. ԷԶՄԻԱԾԻՆ

ԼՂ Հանրապետության Գերագույն խորհրդի նախագահությունը և Նախարարների խորհուրդը, ողջ արցախահայությունը կսկիծով ընդունեցին Ամենայն Հայոց Կաթողիկոս, Ծայրագույն Պատրիարք Վազգեն Առաջինի մահվան բոթը: Կիսում ենք բովանդակ հայությանը պատած մեծ ցավը:

Վշտի այս օրերին, հուսով ենք, Հայ Առաքելական Եկեղեցին սատար է մեր ազգային-ազատագրական պայքարին և աղոթում է մեր ազգային վերածնության համար, որի ջատագովն ու քաջարի զինվորն էր հանգուցյալ Հովվապետը:

Կ. ԲԱԲՈՒՐՅԱՆ

ԼՂՀ ԳԵՐԱԳՈՒՅՆ ԽՈՐՀՐԴԻ ՆԱԽԱԳԱՀԻ
ՊԱՇՏՈՆԱԿԱՏԱՐ

Ռ. ՔՈԶԱՐՅԱՆ

ԼՂՀ ՊՊԿ ՆԱԽԱԳԱՀ

* * *

ՄԱՅՐ ԱԹՈՒ ՍԲ. ԷԶՄԻԱԾԻՆ
ԳԵՐԱԳՈՒՅՆ ՀՈԳԵՎՈՐ ԽՈՐՀՐԴԻՆ

Խորապես ցնցված ենք և անհուն վիշտ ենք ապրում մեր սիրելի Հայրապետի՝ Ամենայն Հայոց Կաթողիկոս Վազգեն Առաջինի վախճանման առթիվ:

Մոտ 40 տարիների ընթացքում գահակալելով մեր ժողովրդի և Եկեղեցու համար դժվարին ու բարդ ժամանակներում, Վեհափառը իմաստուն և հավասարակշռված գործունեությամբ կարողացավ անբարենպաստ պայմաններում ոչ միայն պահպանել Եկեղեցին, այլ նաև ամրացնել Ամենայն Հայոց Կաթողիկոսությունը և շենացնել Մայր Աթոռը: Անուրանալի են Վազգեն Վեհափառի ծառայությունները մեր ազգին և Եկեղեցուն և գերագնահատության ոչ ենթակա:

Մխիթարական է, որ նա ականատեսը եղավ իր ժողովրդի ազգային պետականության վերածնմանը, ինչի նախանձախնդիր ջատագովն էր իր ողջ էությամբ:

Խնդրում ենք մեր խորին վիշտը փոխանցել Հայ Առաքելական Եկեղեցու բոլոր նվիրապետական Աթոռներին, բոլոր հոգևորականներին, ազգային-եկեղեցական մարմիններին, մեր ողջ ժողովրդին:

ՀՀ ԿԱՌԱՎԱՐՈՒԹՅԱՆՆ ԱՌԸՆԹԵՐ
ԿՐՈՆԻ ԳՈՐԾԵՐԻ ՊԵՏԱԿԱՆ ԽՈՐՀՈՒՐԴ